



Piula Theological College

---

# TULITULIMATĀGAU

(POLOKALAME MO FAILAUGA)

“O LE TAPUAIGA FAA-METOTISI”

Rev. Dr. Selota Maliko  
Rev. Tulei Jr. Tulei

Copyright © 2019 Piula Publication, Samoa



# Piula Theological College

---

## O LE TAPUAIGA FAAMETOTISI

### Folasaga:

O lenei pepa ua faaulutalaina, “O le tapuaiga faa-Metotisi.” Ao le i agai le pepa e tulitulimatagau le autu, ‘O le tapuaiga faa-Metotisi,’ e ao ona muai malamalama i le uiga o le upu “tapuaiga” i totonu o le lio faakerisiano.

### O le a le Tapuaiga?

O le upu ‘tapuai,’ (*worship*), e fau mai i le upu “*weorthscipe*,” o le gagana tuai FaaPeretania, o lona uiga *weorth* (*worthy*) po o le “aoga” ma le *-scipe* (*-ship*) e faamatalaina ai le taua, po o le faaaloalo i se tasi. Sa faaogaina pea e faafeiloai ai alii pulenuu i Egelani.

O le tapuaiga, o le fa’aalia o le **ava**, le **migao** ma le **fa’aaloalo** o le tagata tapuai i le Atua po o atua o tapuaiga. E manino i le tusi a Ma’ia’i, o le tapuaiga o le “mataua ma le ava e ave i le Atua; sauniga fa’atapura’iia, ifoga, ifoa’iga e fa’aali ai le migao po o le e’e.”<sup>1</sup> E faapea foi i le tusiga a Lalomilo Kamu, ‘o le tapuaiga o le faatinoga (*embodiment*) o le fesootaiga a le tagata ma le manaola silisiliese (*supernatural*) atoa ma le lalolagi o lo o siomia ai i latou. O le faatinoga (*expression*) o le ola o aso fai soo (*experience*) o tagata o loo faailoa mai ai lo latou nofo malamalama (*awareness*) i le ma le fesagaiga (*encounter*) ma le Atua, po o atua.’<sup>2</sup> O lona malamalamaaga i

---

<sup>1</sup> Papali’i Semisi Ma’ia’i, “*worship*,” *Tusi Upu Samoa: The Samoan Dictionary of Papali’i Dr Semisi Ma’ia’i*. (Auckland: Little Island Press, 2010).

<sup>2</sup> Lalomilo Kamu, *The Samoan Culture and the Christian Gospel*. (Suva, Fiji: USP Library, 1996), 92.



# Piula Theological College

---

le Atua, e mafai ona faamatala mai e ala i fausaga o malumalu tapuai, tatalo, osigataulaga, ofoalofa ma sauniga faamanatu.

## Tapuaiga Faa-Kerisiano

O le tapuaiga Faa-Kerisiano, e le na o se sauniga o le aso Sa, e le na o le alu i le lotu, pe na o le tatalo, pe na o le pese ma lauga—e leai. Ua na o ni nai vaega ia o le tapuaiga Faa-Kerisiano peitai ua le atoatoa. E iai le manatu, o le atoalio o le tapuaiga Kerisiano o lo o taoto i le Tusi Paia.

O le tapuaiga Faa-Kerisiano, peiseai o se **talanoaga i le va o le Atua ma le tagata**. O le Ata 1 i le itulau e 2, ua valivali manino ai le ata o le Tama agalelei ua amatamea i le faaali mai o lona natura paia i le Ekalesia e ala i lona Alo ma le Agaga Paia. O lona uiga, **o le tapuaiga Faa-Kerisiano, o le faaali mai o le Atua, ma le tali atu a le tagata**. (*God reveals and human's response*).

O le faaali mai o le Atua, ua mafai ona tatou molimauina i le mau a loane, “Aua ua faapea lava ona alofa mai o le Atua i le lalolagi, ua ia auina mai lona Atalii e toatasi, ina ia le fano se tasi e faatuatua ia te ia, a ia maua e ia le ola faavavau” (Ioane 3:16).

E manino foi i le Feagaiga Tuai le faaali mai o le Atua i lona nuu o Israelu.

“Ona fetalai mai lea o le Alii le Atua i nei upu uma lava, ua faapea mai, O au o le Alii lou Atua, o le na aumaia oe nai le nuu sa nofo pologa ai.” (Esoto 20:2). Ua toe faamanatu foi e le Atua ia Israelu lo la va faafeagai, “Aua nei fai moo e ni atua ese i o’u luma. Aua e te fai moo e se tupua ua ta, po o se faatusa lava o mea o i le lagi i luga, po o i le fanua i lalo, po o i le sami o i lalo i le fanua; aua e te ifo i ai, aua foi e te auauna i ai; aua o a’u o le Alii lou Atua, o le Atua fua, o le taui atu i



## Piula Theological College

---

fanau le amiotonu a o latou matua, e oo i le tupulaga e tolu ma le fa o e 'inoino mai ia te a'u; a ou te alofa i afe o tupulaga o e alolofa mai ia te a'u, ma tausi mai i a'u poloaiga." (Esoto 20:3-6).

E iai mea taua i le faaali mai o le Atua i le tagata.

(1). O le faaaliga o lona alofa. O le lona uiga, e le manao le Atua e fano le tagata i le agasala. Afai ua faaali mai le alofa o le Atua i le tagata, e tatau foi ona tali atu le tagata i le faafetai ma le vivii i le Atua. O le alofa e faataualofa.

(2) O le tapuaiga Kerisiano, o le amatamea le Atua. E le o se mea a le tagata, ao le galuega mana a le Atua. E amata i le Atua toe faaii i le Atua. E aoga foi le mea nei e fai ma faamanatu, sei soia tatou te tauaimisa ma tusitusilima po o ai na faia le falesa, o ai na faatuina le lotu. Leai o le lotu ma le tapuaiga Faa-Kerisiano o le amatamea a le Atua.


(3) O le faaali mai o le Atua e fealoaloi. E le o se tapuaiga Kerisiano pe afai e alo mai le Atua ae faasagaese ma fulitua atu le tagata. O le uiga foi lea o le upu salamo (*metanoia*) i le gagana Eleni, o le liliu i le Atua.



# Piula Theological College

---


## Ata 1: SOOTAGA FEALOLOA'I





# Piula Theological College

## Ata 2: TAPUAIGA E FAASAGA I LUGĀ MA FAASAGA I AUTAFA



O le tapuaiga Kerisiano o le tapuaiga e faasaga i lugā (Atua) ma faasaga i autafa (tuoai) (*Worship is both vertical and horizontal*). So o se tagata tapuai e tatau ona alofa i le Atua ma alofa i le tuoai.



## Piula Theological College

---

I le **Feagaiga Tuai**, e manino lelei le tulafono a le Atua i lona nuu, “Ia e alofa atu i le Alii lou Atua ma lou loto atoa, ma lou agaga atoa, ma lou malosi atoa” (Teuterenome 6:4-7). O lona uiga, o le tapuaiga o le faaali atu o le “alofa” i le Atua.

I le **Feagaiga Fou**, ua toe teuteu e Iesu le tulafono a le Atua ma toe tuu iai le isi maga. O le maga muamua, “Ia e alofa atu i le Alii lou Atua ma lou loto atoa ma lou agaga atoa ma lou malosi atoa.” Ao le maga lona lua, “Ia e alofa atu i le lua te tuaoi ia pei o oe lava ia te oe” (Mataio 22:37-40; Mareko 12:30-31; Luka 10:27).

O le aoaoga a Iesu, “Pe afai foi e te avatua lau taulaga i le fata faitaulaga, ona e manatu ai lea ua i lou uso se mea e tiga ai o ia ia te oe, ina tuu ia i lea mea o lau taulaga i luma o le fata faitaulaga, a e alu oe ia muai faalelei i lou uso, i le e sau ai, ma avatu lau taulaga” (Mataio 5:23-24).

O le mataupu foi lea e tasi sa lapatai ai e le aposetolo o Ioane le uluai Ekalesia ao feagai ma aoaoga sese. Fa mai le aposetolo, “Pe afai e faapea mai se tasi, “Ou te alofa i le Atua, a e inoino i lona uso, o le pepelo lava ia; aua o le le alofa i lona uso ua vaai atu i ai, e le mafai ona alofa o ia i le Atua ua ia le vaai atu i ai” (I Ioane 4:20).

O lona uiga, o le ute ma auga atoa o le tapuaiga Kerisiano o le “alofa.” E le gata ia alofa i le Atua, ae ia alofa foi i lou tuaoi. E le atoa le tapuaiga pe afai na o le alofa i le Atua ae le alofa i le tuaoi.

### **Tapuaiga Faa-Metotisi**

O le tapuaiga po o le lotu Metotisi sa amataina e le alii faifeau mai le Ekalesia Egelani o **Sione Uesele (1703-1791)**. Sa mafuta faatasi Sione ma nisi e amataina se mafutaga tatalo, le suesueina o le Tusi Paia, o le taliaina o le faamanatuga i vaiaso taitasi, faatasi ai ma le faia o galuega fesoasoani (*charity*). O le ala lea na faaigoaina ai lenei faalapotopotoga



## Piula Theological College

---

‘O le Kalapu Paia’ (*The Holy Club*) po o Metotisi (*Methodist*) ona o metotia sa latou faaogaina e faatino ai lo latou faatuatuaga.

I le **1738**, na lagona ai e Sione se suiga tele i lona ola faaleagaga. Sa ia tusia e faapea, “ua ou lagona le mafanafana uigaese o lou loto. Ua ou lagona le talitonu ia Keriso, ua na o Keriso e toatasi, mo le faaolataga, ma le mautinoa ia te au ua ia aveeseina au agasala.” O lea lagona na faafouina ai Sione Uesele, ma faaosofia ai o ia e avea ma failauga tulaga ese o lea vaitaimi. I tausaga taitasi, sa malaga taamilo Sione i le atunuu e faaogaina ai le solofanua po o le taavale solofanua e asiasi ai ma lauga i sosaiete taitasi.

I le **1739**, sa amata ona lauga Sione i le motu o tagata faigaluega o tane ma fafine i fafo o fale faigaluega. O le **laugaina o le Upu** o le auupega malosia lena sa faaogaina e Sione e liliuina ai tagata i le faaolataga. E molimauina e nisi, o le amataga foi lena o le **Toe Fuataina (Revival)**, ao lolofi ane le faitau afe o tagata e faalogologo i ana lauga ao femalagai solo i le atunuu. Sa ia faatuina ni sosaiete o tagata ua faaolaina ma faamalosia i latou ina ia mafuta i ni vasega toaititi i vaiaso taitasi. O vasega ia sa suesueina ai loto ma O ina lea e afua ai Aso Faavasega a le Ekalesia Metotisi.

E ui ina naunau o ia e taofiofi ai pea lana lotu i lalo o le faamalumaluga a le Ekalesia Agelikana, peitai sa aloalosa le lotu i Egelani mai ana aoaoga. I le 1784, sa ia faatuina ai loa le fausaga, o le Koneferenisi Faaletausaga o Tagata ua faaigoaina o Metotisi, ma le faamoemoe ina ia faaaauina pea le galuega Faa-Metotisi pe a mavae atu ia. O le seneturi e 19, o ina sa matua vave ai le ola ma le faatupulaia o le faatuatuaga Metotisi pei ona iai nei.





# Piula Theological College

---

## **Pesega**

O pese/viiga o tapuaiga sa faaogaina e le gata e vaavaalua ma le Upu ae faapea foi le faamatalaina tuusao o le va feagai o le tagata ma le Atua. O le fua ma le fati o pese e tatau ona fesui ai aua e eseese le malie faapea foi ma le aga (*traditions*) a lea tasi aulotu mai i le isi aulotu. E tofua le pese ma lona uiga ma le faamoemoe. E iai pese vivii ma faafetai, pese o faatoesega, ma pese o manaoga. E iai foi pese sa tusia ona o mea sa tutupu i le tala faasolopito o le Ekalesia. O le Faataitaiga, o le Pese 124 i le Tusi Pese a le Ekalesia Metotisi i Samoa, o lo o iai i le itulau e 3 le faasinoga, O E NA TUSIA PESE. A vaai i lalo ifo o le Pese 124, o lo o iai le faasinoga, [J.S.A.]. I lalo o le faasinoga itulau e 3, o lo o faamaui ai o [J.S.A.] e faasino i le alii misionare o Rev. J.S. Austin [Misi Ausitini] sa galue i Samoa i le 1865-1879, o ia lava sa tusia lenei pese. A fua i le tala faasolopito o lea vai tau, o le pese sa tusia faapitoa e faatatau i le taua a Satupaitea ma Palauli. Ua tei le misionare i le vaavaai atu, o lea faatoa uma le lotu ao lea ua taufetuli solo tagata Satupaitea ma auupega, o nisi ua lava toto uma, o nisi foi ua maliliu i lea taua. Ao le pese peiseai o se tatalo i le Atua ina ia afe mai ma faalata nonofo ma le aulotu i le taimi o faigata. Ae na tali le Atua ina ua sii le Kolisi o Piula i Lufilufi i le 1868. E taua tele le filifili lelei o pese e faatatau i le autu o le tapuaiga ma le ituaiga sauniga.

## **Aisea e tutu ai pe a pepese?**

E lua mafuaaga e afua ai ona tutu le tapuaiga Faa-Metotisi pe a usuina viiga o le Atua.

(1) O le tulai i luga o le aganuu masani a malo Europa (e pei o Peretania). O lo latou tutulai, o le faaalua lea o lo latou faaaloalo i le tupu po o se tasi o le aiga tupu ma e taualoa i se malo. E masani foi ona vaia lea faaaloalo pe a usuina se vii o



## Piula Theological College

---

se atunuu e pei o le vii o le saolotoga o le Malo Tutoatasi o Samoa. Ua masani foi ona vaaia i malae taalo o taaloga faava-o-malo lea aganuu pe a usuina se vii ma sisiina ae se fua o se atunuu. Afai e tutulai tagata o se malo/atunuu ona e faaloalo i le vii o le malo/atunuu, a faafefea ona le tutulai le tapuaig Faa-Metotisi e faaali le faaloalo i le vii o le Tupu o tupu. O lona uiga, o le tutulai i le taimi e usuina ai viiga i le Atua, o le faatinoga o le faaloalo, le migao ma ava tele e tatau ai i le Atua o le Tupu o tupu.

(2) Lua, talu ai o Sione Uesele ma Sale Uesele o tagata faipese tautaua o le seneturi e 19, o le tulai i luga ma pese, o le isi lea metotia faatagata pese e mafai ai ona faasao lelei le alaea, ma faasoa lelei ai le manava, ma feula mai i fafo le leo pe a oo ina pese. Ae afai e nofo i lalo ma pese, e le mafai ona lava le manava ona o loo punitia le alaea e faamoemoe iai le faasoasoina o le leo.

### **Tatalo**

O le tatalo Faa-Metotisi, e masani ona toatutuli, punonou, ma ifo toele i le palapala. E le natia, o lenei aganuu e faaoso augata i tagata lotu aemaise pe afai e maua i le mai tuli, mai nunu, mai suka, mai ponaivi ma isi. O le upu moni e le o tagata tonu ia o lo o augatata e tootutuli aua e tausolomua lava i tagata malolosi. Masalo ai ona o le tiga o tuli i le malo tele o le fola sima o le falesa aemaise lava pe afai e umi le tatalo a le failauga po o le faifeau o taitaia le tapuaiga. I le toatele o Matagaluega ma Aulotu, e iai taimi e maitauina ai, peiseai e faatalitali nisi seiloga e maea le tatalo umi (a le failauga po o le faifeau o taitaia le sauniga), ona faatoa ulufale lea i totonu o le falesa. E iai le taofi, afai e malamalama le tagata tapuai i le mafuaaga e afua ai ona tootuli i le tatalo, ona tali lea o le fesili i le augata e tootuli.



## Piula Theological College

---

### **Aisea e tootutuli ai le tapuaiga Metotisi pe a tatalo?**

O le tootuli ma le faapau fao, o se aganuu sa masani ai tagata tapuai i le Feagaiga Tuai pe a fesagai ma le Atua. Afai e paia, mamalu ma silisiliese le Atua o le tapuaiga Kerisiano, o lona uiga e leai se tasi e mafai ona tu i luma o le Atua. A ifo, punou, ma le tootuli o le faailoga o le feagaiga le tutusa i la va o le Atua paia, mamalu, ma silisiliese ma le tagata agasala. O le faailoga foi o le ususitai (*submission*) ma le faalogo o le tagata tapuai i le fetalai mai o le Atua o Tapuaiga.

### **Tali Tatalo**

O le tali tatalo i le Ekalesia Metotisi, o le isi lea vaega taua tele i lana tapuaiga. E masani ona tatou faalogo i tali tatalo faapei o lenei: Faafetai, Faafetai Iesu, Amene, E moni, loe, loe Iesu, Alofa mai. O le tali tatalo, o le tali po o le amene lea a le aulotu e lalago faatasi i le tatalo o le faafetai, le faatoesega, ma manaoga o lo o faia e le tagata o lo o faia le tatalo. O lona uiga, e le o se tatalo a le tagata e toatasi, ao le tatalo fai faatasi a le aulotu ma tagata uma o le tapuaiga.

### **Viiga ma le Fa'aneetaga:**

O le vivii po o le faaneetaga o le ituaiga tatalo e faamatie ma faaneenee i le Atua. O se tatalo sili lea i le tatalo Faakerisiano ona e faamatala ai po o ai le Atua (*who God is*). O le tatalo e aofia ai vaega nei:

-ia mautinoa lelei o le Atua o tapuaiga Kerisiano—o le Atua paia, o le Atua alofa, ma le Atua tausii faamatua, o ina e afua ai ona alalaga ma faaleo le viiga ma le faaneetaga a le tapuaiga a le Ekalesia i le Atua. O la latou tautinoga foi lea o le alofa o le Atua (Faaaliga 19:6-7a).

-la tatou viiga i le Atua e afua mai i lo tatou iloa lelei o lo tatou faatauvaavaa ma le ola faalagolago faalefoafoaga i le Atua o le foafoaga, o ia (Atua) o le Alefa ma le Omeka.



## Piula Theological College

---

-se ituaiga tautinoga paia ina ua tatou vaaia le mamalu ma le mana o le Atua ia i tatou.

- Ina ua tatou iloa o ai moni lava le Atua (who God is), ona tatou faapauu lea i o tatou tulivae i le tapuaiga.

- lona uiga o le tatalo o le viiga ma le faaneetaga ua aliali mai o se amataga sili ona talafeagai mo so o se sauniga.

-Aua na te valaaulia le faapotopotoga e o mai i luma o le Atua, ma tautino atu, “Ua matou o mai nei aua matou te alolofa ia te oe (le Atua).”

-le tatalo o le viiga e o faatasi ma le faamatalaina/faaalua o lagona o le faaneenee ma le faaloalo i le Atua i la tatou tapuaiga.

-Faataitaiga: I le Salamo 149 ma le 150, o lo o amata ma faaii uma ia salamo i le ailao, “Ia viia le Alii.” A ailao se mea o lona uiga e faailo, e taulagi ma faaleo.

-le tatalo o le faaneetaga e le o se taimi o le faanoanoa po o le faamatalaina o lagona o lo tatou leaga i luma o le Atua paia, e le o le faamamafa o tatou manaoga ma faananauga faaletagata.

-Peitai o le taimi o le liliu ma tulaia o la tatou vaai atoa i le Atua o le na valaau mai ia tatou e tapuai. O lona uiga, ia faamatala manino, ma faafaigofie, ma ia matua sao lelei le tautinoga, po o ai le Atua. O le faaneetaga o le tatalo e tulaia i le Atua o tapuaiga ae le o le tagata tapuai.

-le Tatalo o le Viiga ma le Faaneetaga e fa'amoemoe na te faatulagaina le mauuluga (set the tone) mo le amataina o le sauniga po o le tapuaiga.

### **Faafetai:**

O le tatalo o le faafetai e tulaia i le tala faasolopito, po o le a le mea a le Atua o fai, sa fai, ma o lo o fai fai pea mo le Au Kerisiano ma le lalolagi atoa. O le tatalo faafetai i le Atua e masani ona amata i le toe manatunatu ma toe faailo mea na



## Piula Theological College

---

faia e le Atua i le tala faasolopito. Faaitaiga (Exodus 15:1-2). I le vaai faa-Isareelu, o mea uma sa tutupu i le tala faasolopito, o le fa'aalitino lea o le Atua i le tagata. Ae o mea sili ona taua o mea na tutupu (*historical events*) ua avea ai le soifua, le maliu, ma le toetu o Iesu Keriso ma auga o le faafetai a Kerisiano i le Atua.

E o faatasi foi le tatalo faafetai ma mea ia:

faafetai i le Atua mo le foafoaga  
le tamaoaiga o le eleele  
le sautualasi o le ola  
le mana o perofetaga  
mo le faapotopotoga o le Ekalesia  
meaalofa/foai a aiga ma uo  
ma faamanuiaga le mafaitaulia o aso taitasi

### **Faatoesega:**

O le tatalo o le faatoesega e lelei mo le agaga. Aua pe a uma ona tatou tautino po o ai moni lava le Atua? Ao le a foi lana o fai? O ina tonu lava, e le alofia lo tatou iloa lelei o le mamao o le va o le Atua agalelei ma le le auga o la tagata e tali lona agalelei.

A tatou tapuaiga, ona o tatou maasiasi lea ina ua tatou iloa lelei ala ua tatou pauu ai mai le faamoemoe o le Atua mo i tatou, e le gata o tagata taitoatasi ae faapea foi le Ekalesia. Ae le mafai ona tatou faatoesega e aunoa ma lo tatou iloa o agasala tuga e tatau ona tatou tautino atu. O le mea lea e afua ai ona tuu le tatalo o le faatoesega e nisi faamulimuli pe a uma le lauga, seia muai eli mai i luga e le lauga mea o faaletonu.



# Piula Theological College

---

## **Tatalo o Manaoga, Talosaga, Faatoga mo isi:**

Talu ai ua maua le mafanafana i le tatalo o le faafetai, ua mafai ai foi e le faapotopotoga Kerisiano ona faatoga i le Atua e pei o lenei, “Afio maia sei e toe faia ia fou i matou faapei ona e faia i le amataga.”

Ina ua manatua ma tauloto e le Au Kerisiano le alofa laveai o le Atua, ua afua ai ona faapupulaina o tatou mata i le le ma’alofia o lo tatou ola faalagolago i le Atua. I lenei faapupulaga, ua fafagu ai i tatou ma iloa ai, i totonu o tiga, faanoanoaga ma le fefe, e tasi lava le punavai o le fesoasoani: ua na o le Atua e alofa ia i tatou ma ua fai o la ma puluvaga e fai ma sui o tatou i lea taimi ma lea taimi atoa ma taimi uma. I le fatu o talosaga a le Ekalesia, o taoto ai le lagona faatumulia i le faatuatua ma le talitonu i le Atua.

## **Pe tali le Atua ia tatou tatalo?**

E le tau faamalamalamaina lea fesili aua o lo o manino i aoaoga a Iesu, “O ai foi se tagata o outou pe a ole mai lona atalii i se areto, na te avane ea ia te ia se maa? A ole mai foi i se ia, na te avane ea ia te ia se gata? O lenei o outou o e leaga, afai e iloa e outou ona avatu o mea lelei ma a outou fanau, e le sili ea ona foai mai e lo outou Tama o i le lagi o mea lelei i e ole atu ai ia te ia?” (Mataio 7:9-11).

O le tatalo o manaoga e le gata mo au ae mo isi tagata. E fai i le alofa mutimutivale ma le lagona e puapuagatia faatasi ma isi, faatasi ma le ole atu faapei o au lava ia te au.

O le faatoga i le Atua ina ia galue mai i faafitauli faaletagata o feagai ma mafatiaga. O le tatalo foi e faavae i le talitonuga o le finagalo tutasi o le Atua mo le lalolagi ia faamalolo, faaola, ma faasaoloto mai mafatiaga ma faiga le alofa, o taua, o le oti ma faiga le amiotonu. O loo tatalo Paulo i le Ekalesia ina ia faatoga mo tagata uma (Timoteo 2:1).



# Piula Theological College

---

## **Laugaina o le Upu**

O le anavatau o sauniga lotu Faa-Metotisi i le laugaina ai le Upu, o le faevageliaina, manumaloina o tagata ua liliu mai, atoa ma le faamausaliina o e ua uma ona talia le tapuaiga Faa-Metotisi.

O le lauga o le auau silisili lea ona taua i mea uma ma le faaiuina o tapuaiga uma.

E tatau lava ona masani le failauga ma le au faalogologo. A momoli foi lana feau e tatau ona momoli faatatau i mea o tutupu i lona olaga faapea foi ma olaga o tagata o le aulotu i aso fai soo. A le au le lauga i le mea o lo o ola ai tagata, ona pei lea o se vaalele ua taumafai le ave vaalele e tau faatulaueleele, ae ua le mafai ma ua opeopea i le ea, ona punaoti ifo lea i lalo ae tiai le vaalele. O le talitonuga Faa-Metotisi, a le au le lauga a le failauga i le maliu ma le toetu o Keriso, e le o se lauga.

## **Ituaiga Lotu e Laugaina ai le Upu**

O lotu i Aso Lulu ma le lotu aoauli atoa ma le lotu afiafi i le Aso Sa, o lotu ia e laugaina ai le Upu. O isi lotu e iai le lotu taeao i le Aso Sa ma le lotu Aso Gafua, o le faamamafa lava o le talosiaina o feau sa folafolaina i le Aso Sa. O le Fono Tatalo i le Aso Faraile, o le isi lea sauniga e faataua ai le tatalo faanonomanu a le Ekalesia mo e mamai, faatasi ma manaoga faapitoa o le Ekalesia, le atunuu, ma le lalolagi atoa, atoa ma tagata taitoatasi. O ia sauniga, e mafai ona lauga ai Taitai o Aso Faavasega ona e le o ni lauga e pei o faifeau ma failauga, ae na o ni apoapoaiga.

## **O e mafai ona Lauga**

I le Faa-Metotisi, e na o le toalua lava tagata e faatagaina ona lauga i tapuaiga aoauli ma afiafi o aso Sa ma lotu aso Lulu—e



# Piula Theological College

---

na o le failauga ma le faifeau. O le mafuaaga, e na o le pau ia o tagata ua maea ona sue i suega, ua maua o latou laisene faapitoa mai i le Ekalesia Metotisi, ma ua faauuina mo le faiva o le failauga.

## **Aotelega**

I le aotelega o lenei pepa, o le tapuaiga Faa-Metotisi, e tele vaega peiseai e le o manino lelei ai tagata tapuai. E matua taua tele ona faamalamalama lelei i tagata tapuai le uiga o le tapuaiga, o le faamoemoe o le Atua na afua ai, o le tiute o le tagata tapuai, atoa ma alafua ua kopanoina e faatino ai le tapuaiga Faa-Metotisi. E iai le lagona, afai e malamalama le tagata tapuai i le uiga o ia mea, ona le toe augata lea e tootuli, tulai e pese, ma o le a tapuai fiafia ma saoloto i le Atua o tapuaiga.

## **Fesili Faatupu Manatu:**

1. E iai ni faafitauli o fai ma faalavelave i le faatinoga o tapuaiga a le Ekalesia Metotisi i Samoa?
2. Afai e iai, o le a se auala e faalelei ai ia faafitauli?





# Piula Theological College

---

## TUSI FAAAOGA:

Kamu, Lalomilo. *The Samoan Culture and the Christian Gospel*. Suva, Fiji: USP Library, 1996.

Ma'ia'i, Papali'i Semisi. "worship," *Tusi Upu Samoa: The Samoan Dictionary of Papali'i Dr Semisi Ma'ia'i*. Auckland: Little Island Press, 2010.

Methodist Church of Samoa. *O le Tusi Pese a le Ekalesia Metotisi o Samoa*, Apia, Methodist Printing Press, 2000.

White, James F. *Introduction to Christian Worship*, 3<sup>rd</sup> edition, Nashville; Abingdon Press, 2000.